

Tiwana Turei, ko Hare Haerana, kei nga tari roia, ko Taari Wherehi raua ko Hare Pataka kei to raua na tari ano, he kai-whakamaori a Hare Potaka, ko Raenara Wiremu kei te tari o te kai-whakawa, ko Terei Ngatai he karaka no tetahi kamupene nui, ko Weihana Teramea he karaka ano, ko Poananga he karaka i te tari o te Kaunihera o te taone, ko Hira Paenga kei te Tari Ruri, ko Reweti Kohere he kai-whakaako i Te Raukahikatea, ko Te Mauri kei te mahi toa, tera ano etahi kei te tuawhenua e mahi paamu ana.

KANUI te mate o Hone Heke, kei tetahi hohipera t Poncke ia e takoto ana.

TE UTU o te kaanga ki Akarana e 4s. 2d ki te 4s. 4d mo te puhera : wuuru, mo te korohipurere e 3½d ki te 4½d mo te pauna : kei te heke te utu o te paraoa.

No te 16 o tenei marama i mate ai a Ta Hori Witimca ki Nepia : e 72 ona tau. Ko tenei pakeha tetahi o nga arii i uru ki nga whawhai o Niu Tirenī, i whai ia i a Te Kooi.

I TATA ki te 20 nga kete a Ani Kanara ratou ko ana tamariki i tuku ai ki te hokohoko i Akarana. I tetahi hokohoko i Otepoti i tata ki te 40 nga kete a tenei haku i tuku ai. Kanui te tautoko a tenei ruruhi i te Kura Kotiro i Akarana. Ko etahi wahine e mea ana me utu rawa ka raranga kete ai ratou mo nga mahi nunui. Kei hea hoki ra he moni mo te kura mehemea ki te utua ratou, ka riro ke hoki te moni i a ratou.

Ko te tiamupene mo te eke pahiikara o te ao katoa he mangamangu no Amerika ko Meiha Teira tona ingoa. I tona reihitanga ki Ahitereiria riro katoa i a ia nga moni nunui. He tangata tino whakapono a Meiha Teira : kaore ia e inu waipiro, e kai-paipa. I a ia i Iuropi ka tohea ia kia reihī i te Ratapu otira kore rawa ia i whakaae. I tata ki te £7,500 nga moni ingaro ki a ia i tona korenga e reihī i te Ratapu, otira e mea ana ia kaore ia i te rawakore. He tangata tino humarie tenei, kaore e riro i nga mahi kimo.

KUA tae mai ki Niu Tirenī nei, kua riro hoki, te wahine reureka atu ki te waiata o te ao, ko Madame Melba tona ingoa. I whiwhi ia ki te £30,000 i ona waiatātanga ki Ahitereiria. I tona waiatātanga i nga taone nunui o Niu Tirenī nei e £500 te utu moni i te po kotahi. He rua koura tonu te waha reka ki te waiata.

I PUTA he raruraru nui ki Whiti, huri ana tetahi hapu maori ki te Hahi Pikopo, ko to ratou karakia tawhito he Weteriana. No to ratou huringa ki te Pikopo ka tabuna a ratou Paipera, me nga himene ki te ahi i runga i te kupu a nga minita Pikopo. Kanui te riri o nga hahi Perotehana. Ko te tino nuinga o nga maori o Whiti he Weteriana. He Weteriana nga Whiti i haere ki Ingarangi ki te whakawahinga o Kingi Eruera. E kīia ana o nga hoia katoa o nga koroni i haere ki Ingarangi ko nga Whiti anake i whakawhetai i nga kainga, i karakia hoki i te ata i te ahihi.

I RONGO mitou kua puta te kupu a Te Wiremu, Atrikona, kia tapiritia e ia te oranga o nga minita maori ia tau ia tau, kia £10 ma te minita kotahi.

HEI te mutunga o tenei tau ka haere ki Ingarangi a Te Tiatatene, mahita o Te Rau Karei raua ko tana hon-wahine. Kia kotahi te tau e ngaro atu ana ka hoki mai ki tana mahi. Kanui te pirangiia o tenei tangata e nga tangata o Turanga nei.

E HAERE ana a te Tutanekai ki Rarotonga me era atu monite, ki te kawe i nga moni o te Paremete kia kite e era whenua kua tuku nei ki raro i te Kawanatanga o Niu Tirenī. Kei te riri etahi pakeha kei te mea he whakapau na i nga moni o te koroni.

I TE matenga o Pihopa Kau i Akarana ka whakaaohia me tiki i Ingarangi he pihopa, whiriwhiria ana ko Nerikena, he minita no Ruana. He taitamariki, he tangata kaha ki te mahi, pai ki te kauwhau, whakaaro ki nga mahi mihimare. Ki nga rongo korero i tika tona whiriwhiringa hei pihopa mo Akarana, tera e kaha tana tautoko i te Hahi Maori. Hei a Mei nei ia rere mai ai i Ingarangi. I tū o pouri tona parahi i te rongonga e haere mai ana to ratou matua ki te Whetu o te Tonga.

KUA PUTA noa atu nga tohutohu a Te Pīpīwhārauroa mo te webe i te wahi whakatekau o nga rawa a te tangata ki nga mahi a te Atua. I puta te whakaaro i a Hemi Matenga kia aru ia i taua tikaanga ara kia webe i te wahi whakatekau o nga moni e whiwhi ana i ana hokonga rawa. No te kitinga o Te Tiatatene i a ka homai e te Matenga he tiki e £50 mo nga mahi o te Hahi Maori, a kua tukua e Te Tiatatene taua moni hei oranga mo nga minita Maori o Akarana. £10 te kōhi a Te Matenga mo te whare karakia o Te Rau. Tera atu ano etahi o nga mahi ohaoha a tenei tangata.